

Teach na bPaidreacha

Ceist 1 Beidh tú ag féachaint ar ball ar thuairisc faoi Christina Gallagher agus Teach na bPaidreacha ar Oileán Acla. Féach ar an alt uair amháin agus pléigh an cheist seo leis an duine in aice leat:

Cé mhéad den scéal a d'éirigh leat a thuiscint, bunaithe ar na pictiúir agus ar eolas ar bith eile a bhí agat cheana féin?

Ceist 2 Seo stór focal a bhí le cloisteáil sa tuairisc. Ag obair leis an duine in aice leat ceangal na focail ar chlé leis na focail ar dheis.

- | | |
|------------------|------------------------|
| 1. bunaitheoir | (a) attracting |
| 2. tuairiscíodh | (b) knowledge of |
| 3. ag mealladh | (c) founder |
| 4. oilithreach | (d) it was alleged |
| 5. líomhnaítear | (e) arising from |
| 6. ag eascairt | (f) it was reported |
| 7. lucht lóistín | (g) Archdiocese |
| 8. Ard-Deoise | (h) pilgrim |
| 9. aithne ar | (i) hospitality sector |

1	2	3	4	5	6	7	8	9
c								

Ceist 3 Anois féach ar an tuairisc cúpla uair agus déan iarracht na píosaí eolais sa dá cholún thíos a cheangal. Pléigh do chuid freagraí leis an duine in aice leat.

1. Bhunaigh Christina Gallagher an teach	a. ag labhairt i gcoinne Christine Gallagher
2. Líomhnaítear sa <i>Sunday World</i>	b. nach raibh aon rud le rá acu ar an ábhar
3. Ghlaigh daoine isteach ar <i>Liveline</i>	c. go bhfuil saibhreas ag Christina Gallagher
4. Dúirt daoine ar Oileán Acla	d. i 1993
5. Dúirt urlabhraí ó Theach na bPaidreacha	e. gur mór an buntáiste é Teach na bPaidreacha do lucht lóistín

Ceist 4 'Dúirt daoine ar . . .'

(a) Cén ghné den ghramadach atá i gceist leis an fhocal atá i gcló Iodálach thuas?

(b) Pléigh eolas ar bith atá agat faoin ghné seo leis an duine in aice leat agus breacaigí síos na rialacha a bhaineann leis.

(c) Anois líon na bearnaí thíos. Tá an chéad cheann déanta duit.

abair	dúirt	ar dhúirt
tá	_____	_____
clois	_____	_____
déan	_____	_____
faigh	_____	_____
feic	_____	_____
ith	_____	_____
tabhair	_____	_____
tar	_____	_____
téigh	_____	_____

Ceist 5 Pléigh na ceistanna seo leis an duine in aice leat nó le do ghrúpa:

An bhfuil Christina Gallagher ag teacht i dtír ar dhaoine leochaileacha?

An raibh aiféala ort riamh as airgead a thabhairt d'aon duine ?

Treoracha agus Freagraí

Ceist 1

Tá an ceist seo le plé sula gcuirtear an mhír ar siúl.

Ceist 2

1	2	3	4	5	6	7	8	9
C	f	a	h	d	e	i	g	b

Ceist 3

1 – d

2 – c

3 – a

4 – e

5 – b

Ceist 4

An Aimsir Chaite atá i gceist.

Rialacha a bhaineann leis an Aimsir Chaite:

1. Cuirtear séimhiú ar fhréamh an bhriathair – **chuir** mé/tú/sé/sí/muid/sibh/siad.
2. ‘Ar’ a úsáidtear le ceist a chumadh – **Ar** chuir tú an litir sa post? Chuir.
3. ‘Níor’ a úsáidtear leis a fhreagra diúltach a chumadh – **Níor** chuir.

abair

dúirt

ar dhúirt

tá

bhí

an raibh

clois

chuala

ar chuala

déan

rinne

an ndéarna

faigh

fuair

an bhfuair

feic

chonaic

an bhfaca

ith

d’ith

ar ith

tabhair

thug

ar thug

tar

tháinig

ar tháinig

téigh

chuaigh

an ndeachaigh

Ceist 5

Is féidir gach beirt a chur ag déanamh an phlé seo agus ansin na ceisteanna a phlé leis an rang iomlán.

Teach na bPaidreacha

Eimear Ní Chonaola

Dúirt daoine ar Acaill ar nuacht TG4 inniu nach bhfuil a fhios acu a gcreideann siad an méid atá ráite le trí seachtainí anuas faoi Christina Gallagher, bunaitheoir Theach na bPaidreacha, *The House of Prayer*, mar is fearr aithne air, ar an oileán.

Tuairiscíodh i nuachtán Domhnaigh inné go raibh Christina Gallagher ag fanacht i dteach luach breis agus ceithre mhilliún euro. Tá an scéal ag Eibhlín Ní Choistealbha.

Eibhlín Ní Choistealbha

Seo é Tigh na bPaidreacha nó an *House of Prayer*, mar is fearr aithne air anseo ar Oileán Acla i gContae Mhaigh Eo. Bhunaigh Christina Gallagher, bean as Maigh Eo, an tigh seo i 1993. Tigh atá ag mealladh sluaite oilithreach ó shin i leith. I sraith altanna a foilsíodh sa nuachtán *The Sunday World* le trí seachtainí anuas, líomhnaítear go bhfuil saibhreas ag Christina Gallagher. Taispeántar pictiúir de thigh i Mullach Íde i mBaile Átha Cliath, gur fiú ceithre mhilliún euro é agus ina bhfuil Gallagher ag cur fúithi a deir an páipéar. Taispeánadh pictiúr de ghluaisteán BMW, *seven series*, a deir an páipéar atá á thiomáint ag Gallagher. Ag eascairt as na haltanna seo ghlaigh daoine isteach ar an gclár raidió *LiveLine* ag labhairt i gcoinne Christina Gallagher. Dúirt daoine atá ag maireachtáil anseo ar Oileán Acla ach nach raibh sásta labhairt ar cheamara linne inniu gur mór an buntáiste é Tigh na bPaidreacha do lucht lóistín agus lucht óstáin i nGob an Choire ar an oileán mar go mbíonn oilithrigh ag teacht anseo gach deireadh seachtaine.

Dúirt daoine eile linne inniu nach raibh a fhios acu ar chreid siad an méid a líomhnaíodh sa pháipéar agus gur cheart aon airgead a dhéantar i dTigh na bPaidreacha a chur thar n-ais isteach ann. Deir Ard-Deoise Thuama nach dtugann siad cead don obair atá ar bun ag dTigh na bPaidreacha mar atá rudaí faoi láthair agus go bhfuil an obair atá ar bun ann príobháideach. Dúirt urlabhraí ó Thigh na bPaidreacha linne inniu nach raibh aon rud le rá acu ar an ábhar.

Eibhlín Ní Choistealbha, Nuacht TG4 ar Oileán Acla.